

Ahmad Wardi retak tulang hidung

©. Hanan (M)
26 JUL 1989

PEMENANG pingat emas Kejohanan Silat Sedunia '87, Ahmad Wardi Salim terpaksa dikejarkan ke Hospital Besar Kuala Lumpur apabila cedera di bahagian hidung dalam latihan harian petang kelmarin.

Pesilat Kelas B skuad Sukan SEA XV itu tersungkur ke lantai ketika bertarung dengan juara Kelas D kebangsaan, Zakri Ibrahim menyebabkan tulang hidungnya retak.

Setakat ini, kedudukan pesilat itu untuk mewakili negara belum diketahui dan ia bergantung kepada laporan pegawai perubatan Hospital Besar Kuala Lumpur, (HBKL).

Sebelum ini, dia dihantar ke Hospital Daerah Kajang setelah diarah oleh Unit Perubatan Sukan Majlis Sukan Negara (MSN).

Tetapi, pegawai perubatan hospital terbabit mengarahkan pesilat yang ditemani oleh ketua jurulatih kebangsaan, Sani Morni mendapat rawatan lanjut di HBKL.

Bagaimanapun Pegawai Perubatan MSN, Dr Nordin Darus, enggan mengulas mengenai perkara itu.

Sumber-sumber Unit Perubatan MSN, mengasahkan Ahmad mungkin mengalami retak tulang hidung.

"Kami terkejut melihat keadaan Ahmad yang pucat dan berdarah. Kami terpaksa menghantarnya ke Hospital Daerah Kajang yang berdekatan. Ini adalah kemalangan pertama berlaku sejak Kem Latihan Kebangsaan bermula 15 Julai lalu," kata sumber itu.

Hingga petang semalam, Dr Nordin berkata dia belum menerima laporan mengenai Ahmad Wardi.

Ahmad Wardi adalah pesilat harapan Persekutuan Silat Kebangsaan Malaysia (Pesaka) untuk menyumbangkan pingat pada Sukan SEA, bulan depan.

Dalam perkembangan lain, hampir separuh daripada 28 pesilat yang diserang sakit kerongkong, demam selsema dan batuk beransur pulih.



■ HEBAT...Ahmad Wardi peserta harapan pingat negara sedang beraksi.